

KE ARAH KERJASAMA UMNO DAN PAS  
Ringkasan Pandangan  
Oleh  
Tun Abdul Hamid Mohamad

1. British menjajah Semenanjung Tanah Melayu (STM) daripada Raja-Raja/orang Melayu.
2. Orang Cina dan India datang dengan ramainya, mula-mula untuk mencari kekayaan dan pulang ke negara asal, tetapi akhirnya terus tinggal di STM.
3. Orang Melayu bersatu menentang Malayan Union, menentang ancaman Pengganas Kominis dan menuntut "Kemerdekaan tanah air".
4. Orang bukan Melayu menyertai pergerakan menuntut Kemerdekaan apabila mereka nampak Kemerdekaan akan menjadi kenyataan untuk menjaga kepentingan mereka.
5. PAS ditubuh apabila Haji Ahmad Fuad Hassan kalah dalam pertandingan merebut jawatan Presiden UMNO kepada Tunku Abdul Rahman, mulanya sebagai satu cabang UMNO tetapi kemudiannya bertanding dalam PRU 1955.
6. Semasa Perlembagaan Persekutuan sedang digubal, PAS menuntut supaya Pulau Pinang dan Melaka dijadikan "Negeri Melayu" (bersultan) untuk menjaga kepentingan orang Melayu dan kedudukan agama Islam. Parti Kominis Malaya (majority orang Cina) mengangkat senjata untuk menubuh sebuah kerajaan Kominis ala-China. Parti Boroh (majority orang Cina) menuntut supaya "Negeri-Negeri Melayu" dihapuskan untuk mengelak "Malaya" yang merdeka menjadi sebuah "Negara Feudal". Orang-orang Cina mahukan "dual-citizenship", "Malaya" dan China dengan kerakyatan China sebagai kerakyatan utama. Ada satu kumpulan orang Cina di Pulau Pinang yang tidak mahu Pulau Pinang merdeka dalam STM. Mereka mahu ia kekal di bawah jajahan British seperti Hong Kong.
7. Hasil tolak ansur persetujuan dicapai. Kandungannya tersurat dalam Perlembagaan Persekutuan. Antara lain, kerakyatan diberi kepada orang bukan Melayu. Beberapa perkara yang dituntut oleh orang Melayu seperti, kedudukan agama Islam sebagai agama Persekutuan, Bahasa Melayu sebagai Bahasa Kebangsaan, jaminan mengenai "hak keistimewaa orang Melayu" (Perkara 153), Regimen Asykar Melayu dan Tanah Simpanan Melayu juga dipersetujui dan diperuntukkan dalam Perlembagaan Persekutuan.
8. Pada 31 Ogos 1957, STM merdeka. Pada malam itu waganegara STM bertambah sekali ganda, akibat orang bukan Melayu menjadi waganegara mengikut peruntukan Perlembagaan Persekutuan. Akibatnya, jika dalam Pilihan Raya Umum 1955, pengundi Melayu adalah sebanyak 84.2%, dalam

Pilihan Raya Umum 1959, hanya dua tahun selepas Merdeka, pengundi Melayu jatuh kepada 57.1%.

9. PAS menentang penubuhan Malaysia, apatah lagi termasuk Singapura, kerana khuatir ia akan menjejaskan hak orang Melayu dan kedudukan agama Islam.
10. Selama lebih kurang tiga dekad selepas penubuhannya, PAS telah memainkan peranan yang berfaedah kepada bangsa Melayu dan agama Islam di Malaysia. PAS tidak terlalu besar untuk menjadi ancaman kepada UMNO di peringkat Persekutuan. Pengaruhnya tertumpu di Pantai Timur STM. Tidak ada perbezaan kepada orang Melayu dan agama Islam sama ada UMNO atau PAS memerintah Kelantan. Lagi pula, adanya PAS menyebabkan UMNO lebih berhati-hati berkenaan isu Melayu dan Islam.
11. Selama lebih kurang lima dekad semenjak Merdeka, kecuali dalam 1969, tidak ada cabaran serius terhadap hak orang Melayu dan kedudukan agama Islam. Sebabnya, sebilangan besar orang Melayu menyokong UMNO, kerajaan Persekutuan teguh di bawah Barisan Nasional dan UMNO dapat mengawal parti-parti sekutunya daripada membuat tuntutan-tuntutan yang melampau.
12. Keadaan berubah dalam masa lebih kurang sepuluh tahun di kebelakangan ini. Orang Melayu berpecah tiga. Melihat keadaan itu, orang Cina yang memang pandai membuat perkiraan dan pakatan, bersatu di belakang DAP. PKR dan PAS setuju berkerjasama dengan DAP. Akibatnya, pengundi bukan Melayu menjadi suara penentu dalam pilihan raya.
13. Merasai mereka telah kuat, orang-orang bukan Melayu, terutama sekali orang Cina, mula membuat tuntutan-tuntutan yang melampau dan mencabar hal-hal mengenai agama Islam, termasuklah khotbah Jumaat. Mereka tidak puas hati dengan “kestimewaan” yang dinikmati oleh orang Melayu. Mereka mahu semuanya dibahagikan secara “sama rata”. Mereka tahu jika dibuat demikian, merekalah yang akan membolot seala-galanya kerana mereka *control* ekonomi, kaya dan lebih maju dalam semua bidang. Sebenarnya mereka mahu hak orang Melayu tanpa mengorbankan hak mereka.
14. Jika Pakatan Rakyat (termasuk PAS) dapat menubuh kerajaan di peringkat Persekutuan, DAPlah yang akan menjadi parti dominan. PKR tanpa Dato' Seri Anwar Ibrahim tidak akan dipandang serius oleh DAP. PAS lagilah tidak akan “didengar” oleh DAP.
15. Kerajaan Pakatan Rakyat semestinya akan menghakis hak-hak orang Melayu dan kedudukan agama Islam. Orang Cina bersatu di belakang DAP kerana DAP menjanjikan sesuatu yang lebih dan kerana mereka mahu lebih daripada yang mereka perolehi di bawah pemerintahan Barisan Nasional. Dari mana bahagian “yang lebih” itu akan datang? Semestinya daripada bahagian orang Melayu.
16. Mungkin mereka tidak akan memperolehi majority dua pertiga di Parlimen dan persetujuan Majlis Raja-Raja (di mana diperlukan) untuk meminda

Perlembagaan. Sambil itu kita mesti waspada tentang kemungkinan mereka akan melakukan perubahan kepada kawasan Parlimen dengan menambah bilangan kerusi di kawasan Cina yang padat penduduknya.

17. Namun demikian, perlu diingati bahawa hak-hak orang Melayu dan kedudukan agama Islam boleh dihakiskan secara pentadbiran sahaja. Sebagai misalan, peruntukan mengenai kedudukan agama Islam sebagai agama Persekutuan hanya memberi manfaat jika dan apabila kerajaan yang memerintah melakukan sesuatu untuk meletakkan agama Islam di tempat yang sesuai dengan kedudukan itu. Apa yang kita lihat hari ini, baik universiti-universiti, institusi-institusi dan jabatan-jabatan Islam; Institusi-Institusi Kewangan Islam, Tabung Haji, pengajaran mata pelajaran agama Islam daripada tadika hingga ke university, masjid-masjid, tilawah al-Qur'an, sambutan Ma'al Hjah dan Maulidur Rasul, rancangan-rancangan agama di talivisyen dan radio, majlis-majlis tahlil, ceramah perdana dan lain-lain adalah hasil daripada apa yang dilakukan oleh kerajaan yang memerintah selama ini. Jika tidak dilakukan, tidak akan ada apa-apa, hanya peruntukan dalam Perlembagaan.
18. Demikian juga dengan peruntukan mengenai hak-hak orang Melayu. Jika kerajaan yang memerintah tidak berbuat apa-apa, tidak ada apa yang akan dinikmati oleh orang Melayu. Misalnya, jika tidak ada Dasar Ekonomi Baru, Perbadanan Nasional Berhad, penetapan dan pelaksanaan dasar mengenai pemberian biasiswa, pengambilan pegawai-pegawai kerajaan dan lain-lain, peruntukan-peruntukan itu tidak akan memberi apa-apa manfaat kepada, malah akan merugikan, orang Melayu.
19. Semenjak Merdeka, melalui dasar dan tindakan kerajaan Perikata dan Barisan Nasional, peruntukan-peruntukan itu dapat dimanfaatkan. Ia telah ada *track record*. Saya tidak fikit kerajaan Pakatan Rakyat akan atau akan dapat melakukan perkara yang sama. Ertinya hak orang Melayu dan kedudukan agama Islam akan terhakis jika kerajaan Barisan Nasional yang di terajui oleh UMNO, tumbang.
20. Demi mengelak perkara itu berlaku, kerajaan Barisan Nasional di peringkat Persekutuan mestilah dipertahankan.
21. Pada pendapat saya cara yang paling mudah ialah: Jika selepas PRU 14, didapati kerajaan Barisan Nasional di peringkat Persekutuan akan tumbang, PAS hendaklah menyertai kerajaan Barisan Nasional, sekurang-kurangnya di peringkat Persekutuan untuk menyelamatkannya. PAS mesti sedar bahawa dengan berkerjasama dengan DAP dan PKR ia akan mengorbankan kepentingan orang Melayu dan agama Islam. PAS perlu sedar bahawa, dalam konteks Malaysia, apa yang menguntungkan orang Melayu akan menguntungkan umat Islam dan apa yang merugikan orang Melayu akan merugikan umat Islam. Demikian juga, apa yang menguntungkan umat Islam akan menguntungkan orang Melayu dan apa yang merugikan umat Islam akan merugikan orang Melayu,

22. Sebenarnya, pada masa ini, di antara UMNO dan PAS sudah tidak ada apa-apa perbezaan ideology lagi unuk menghalang kerjasama itu. Yang menjadi penghalang hanyalah kekhawatiran pemimpin-pemimpin dan penyokong-penyokongnya jika kerjasama itu akan menggugat kepentingan diri mereka. Selain daripada itu adalah isu-isu yang dipolitikkan kerana ia adalah mudah, murah dan popular untuk membezakan UMNO dengan PAS dan memancingundi. Misalnya asabiah dan hudud.
23. PAS telah memerintah Kelantan selama lebih kurang 40 tahun. Apa bezanya Kelantan dengan negeri-negeri lain di Semenanjung Malaysia? Undang-undang yang dipakai di Mahkamah Syari'ah seperti Enakmen Acara Mal, Enakmen Acara Sivil dan Enakmen Undang-Undang Keluarga Islam dibuat semasa pemerinthan Barisan Nasional dan saya menjadi Penasihat Undang-Undangnya. Memang ia telah diganti tetapi, dari segi isi kandungannya, itu hanya pengemaskinian yang dilakukan untuk menyelaraskan dengan undang-undang yang di pakai dinegeri-negeri lain yang diperintah oleh Barisan Nasional.
24. Maka, pemimpin-pemimpin UMNO dan PAS yang sama-sama Melayu dan Islam, yang sama-sama untung dang rugi, perlulah menumpukan perhatian kepada ancaman besar yang berada di hadapan mereka, orang Melayu dan umat Islam di Malaysia. Mereka patutlah mengeneipkan dahulu perbezaan yang diada-adakan untuk tujuan politik dan menumpukan usaha untuk menyelamatkan hak orang Melayu dan kedudukan agama Islam.
25. Dengan cara yang saya cadangkan ini, UMNO dan PAS masing-masing boleh kekal seperti sekarang sebagai parti politik yang berasingan. Tetapi, pada pandangan saya PAS patut keluar daripada Pakatan Rakyat. Pakatan Rakyat merugikan orang Melayu dan umat Islam. Di peringkat negeri, PAS boleh bertanding bersendirian. PAS boleh memerintah negeri-negeri yang dimenangnya seara bersendirian. Tetapi, untuk mengelak sesebuah negeri terjatuh kepada DAP dan PKR, misalnya Perak, PAS patut berkerjasama dengan Barisan Nasional untuk menubuh kerajaan campuran. Di peringkat Persekutuan, PAS boleh memilih untuk menyertai Kabinet dan duduk bersama wakil-wakil rakyat Barisan Nasional di Parlimen. Atau, mereka boleh duduk berasingan seperti ahli-ahli "bebas" tetapi, dalam isu yang melibatkan kepentingan orang Melayu dan umat Islam, mereka akan menyokong kerajaan Barisan Nasional.

Sekian. Terima kasih.

Ikhlas,

Tun Abdul Hamid Mohamad

13 02 2015

[tunabdulhamid@gmail.com](mailto:tunabdulhamid@gmail.com)  
[www.tunabdulhamid.my](http://www.tunabdulhamid.my)